

O padatengan ni fofo

O kacanglahan a palapatan, malengaw to ko mipalomaan ni fofo a dating. Rohroh sa a malangdaw ko pinalengaw i padatengan ni fofo. Kahirahira sa ko 'adipangpang a maefer i padatengan. Kahemekan! Maolahay kako tona padatengan ni fofo. Tahidangan ni fofo kako ato safa a mikosam misadafdaf a misakapah to padatengan. Tahira ho i padatengan ko safa i, comikay to a milalepel to 'adipangpang. Anaana ko dateng ako, sa ci fofo a milekal.

Ma'araw ho ko kasaofaofang no tamana, todong to o nga'ayay to a datengen. Hapinang han ako a misahacececey ko papah no tamana a minengneng. Iraay hakiya itira ko fao? O sasongila'en a mitayal konini a demak, hay mafana'ay milalimek ko fao i papah no dating. Pakahapinangay ho ko mata namo to pikari'ang no fao, sa ci fofo. Ma'araw ho ako kora fao i, tangsolen to a miala. Tahira i kalahecian no piala to fao i, maedeng cecay to a so'ot a maemin! Ona pidomokos niyam to narorayan ni fofo a padatengan i, idahiyay to kamo sa ci fofo a mahemek.

Doedo sa to i, mitoro' ci fofo tora idadasian a milaladay a tomato,s. Sowel sa, alaen kora marohemay to a tomato, sa. Ma'araw ako ko

ta'angayay marohemay a tomato i, maharateng ako koya miciyanan a tomato ato fita'ol, tanohemek sa kako a mipitpit. Itiya pacekok sa ko safa a milekal, sa'aredet sa a kaenen kona tomato, sa. O caroh to nira, sakakomaenaw korira, kakekkek sa to kako aci fofo a mitatawa.

Roma sa to i, miala ci fofo to hoso a cefos to dating. Ya nanom toya sapicefos nanihoso i, lesap sa a macelak. Hato saasik a nengnengen. Mapatedi' no cidai i, hato lidek, sakapah sa a nengnengen. Lekal sa kako ato safa a mahemek. Kahemekan kona picacefos to dateng, kako ho ko micefosay han ako ci fofo. Pakafana'en to ni fofo kako a mimami'mi' to kasadakan no nanom i hoso. Fawah han ko nanaom i, macefos kora minengnengay a safa i fati'ian, lekal sa ko mira, tawatawa sa to kako.

Miaala to fao, mipitpit to tomato, micefos to dateng i padatengan ni fofo, tadakahemek to! Ahowiday ci fofoan a malalok a misadateng sapakaen tamiyanan. Sowel sa ci ina, o sanga'ayay a kakaenen, o sakatanektenk no tireng ko mipalomaan ni fofo a dating, sa.

阿嬤的菜園

描述和弟弟在阿嬤的菜園裡度過的愉快時光。每到春天，菜園充滿生機，我和弟弟會一起幫忙照顧菜園。弟弟總是忙著抓蝴蝶，而我則小心翼翼地檢查高麗菜葉子，確保沒有菜蟲。當阿嬤指示摘下熟透的蕃茄時，我想到自己最愛的蕃茄炒蛋，弟弟也忍不住先嚐一顆蕃茄。阿嬤澆水時，陽光照射下，興奮地發現彩虹，開心地玩水，成了落湯雞。感謝阿嬤辛勤種菜，並認為阿嬤的菜是最健康、最好吃的，這段回憶充滿溫馨和快樂。